



職方典第一千五百十五卷

雲南土司部彙考一

老撾考

唐

帝堯陶唐氏五載南夷越裳氏來朝獻大龜 按史記五帝本紀不載 按通鑑前編陶唐之

世南夷有越裳氏重譯來朝獻神龜龜千歲方三尺餘背有蝌蚪文記開闢以來堯命錄之謂之龜曆

周

成王六年越裳氏來朝 按史記周本紀不載 按通鑑前編交趾南有越裳氏重三譯而來

獻白雉周公曰德澤不加君子不享其贄政令不施君子不臣其人譯曰吾國之黃耆曰天無烈風淫雨海不揚波三年矣意中國有聖人乎於是來朝周公致薦於宗廟使者迷其歸路周公錫以駟車五乘皆爲指南之制使者載之由扶南林邑海際期年而至其國故指南車常爲

先導示服遠人以正四方

按後漢書南蠻傳交趾之南有越裳國周公居攝六年制禮作

樂天下和平越裳以三象重譯而獻白雉曰道路悠遠山川阻深音使不通故重譯而朝成王以歸周公曰德不加焉則君子不饗其質政不施焉則君子不臣其人吾何以獲此賜也其使請曰吾受命吾國之黃耆曰久矣天之無烈風雷雨意者中國有聖人乎有則盍往朝之周公乃歸之於王稱先王之神致以荐於宗廟周德既衰於是稍絕

按會典老撾併八百賜

例俱與車里同但通事羅衣改紵絲衣

按四譯館考老撾軍民宣慰使司俗呼爲撾家卽

古越裳地明永樂三年其酋招攬章入貢始置宣慰使司其地東至水尾南至交趾西至靈遠北至車里其民皆百夷性獷悍身及眉目皆刺花樣服食器用大類木邦其酋長有三等長曰招木弄次曰招木中又次曰招化爲宣慰者招木弄也居高樓其上寬廣見人不下樓部屬見之則所至之地各有等限使客亦然設通事引之以至其地不差尺寸土產犀象乳香西水香

鮮子訶子

昆明蠻考

唐

高祖武德 年昆明蠻與牂柯遣使入貢 按唐書本紀不載 按南蠻傳蠻蠻西有昆明蠻

一曰昆彌以西洱河爲境卽葉榆河也距京師九千里土畝濕宜秔稻人辨首左衽與突厥同
隨水草畜牧夏處高山冬入深谷尙戰死惡病亡勝兵數萬武德中巂州治中吉倬使南寧因
至其國諭使入朝貢求內屬發兵戍守自是歲與牂柯使偕來

高宗龍朔三年矩州刺史謝法成招慰比樓等七千戶內附 按唐書本紀不載 按南蠻傳
云云

總章三年置祿州湯望州 按唐書本紀不載 按南蠻傳云云

咸亨三年昆明十四姓內附析其地以安輯之 按唐書本紀不載 按南蠻傳咸亨三年昆
明十四姓率戶二萬內附析其地爲殷州總州敦州以安輯之殷州居戎州西北總州居西南
敦州居南遠不過五百餘里近三百里其後又置盤麻等四十一州皆以首領爲刺史

憲宗元和八年昆明上表請盡歸牂柯故地 按唐書憲宗本紀不載 按南蠻傳昆明東九

百里卽牂柯國也兵數出侵地數千里元和八年上表盡歸牂柯故地

文宗開成元年鬼主阿瑠內屬 按唐書文宗本紀不載 按南蠻傳開成元年鬼主阿瑠內屬會昌中封其別帥爲羅殿王世襲爵其後又封別帥爲滇王

後唐

明宗天成二年牂牁使宋朝化及昆明使者來 按五代史明宗本紀云云 按四彝附錄昆明在黔州西南三千里外地產羊馬其人椎髻跣足披氍其首領披虎皮天成二年嘗一至其首領號昆明大鬼主羅殿王普露靜王九部落各遣使者來使者號若土附牂牁以來

史記

嵩昆明

西南夷傳自同師以東北至樸榆名爲嵩昆明皆編髮隨畜遷徙毋常處毋君長地方可數千里 注徐廣曰永昌有嵩唐縣索隱曰崔浩云嵩昆明二國名韋昭云益州縣正義曰嵩音髓今

澧州也昆明嵩州縣蓋南接昆明之地因名也

通志

昆明蠻

昆彌國唐書一曰昆明西朝彝也在爨之西洱河爲界其俗與突厥略同相傳云與匈奴本兄弟國漢武帝得其地入益州部其後復絕諸葛亮定南中亦所不至武德四年嵩治中吉弘使南寧因至其國諭之入貢新唐書又云土畝濕宜秔稻隨水草畜牧夏出高山冬入深谷今瀾滄衛永寧浪渠間當是其地風俗亦略同大理志乃謂昆彌爲白巖非也諸葛亮伐南蠻戰於洱水之南白巖姚嵩入滇古路何言不至耶其實昆明以池得名昆彌之爲昆明聲相近而訛耳

南詔考一 唐一

高宗 年南詔細奴邏遣使入貢賜錦袍 按唐書高宗本紀不載 按南蠻傳南詔或曰鶴拓曰龍尾曰苴咩曰陽劍本哀牢夷後烏蠻別種也夷語王爲詔其先渠帥有六自號六詔曰蒙嵩詔越析詔浪穹詔盞賧詔施浪詔蒙舍詔兵將不能相君蜀諸葛亮討定之蒙舍詔在諸

部南故稱南詔居永昌姚州之間鐵橋之南東距爨東南屬交趾西摩伽陀西北與吐蕃接南
女王西南驃北抵益州東北際黔巫王都羊苴咩城別都曰善闡府王坐東嚮其臣有所陳以
狀言而不稱臣王自稱曰元猶朕也謂其下曰昶猶卿爾也官曰坦綽曰布燮曰久贊謂之清
平官所以決國事輕重猶唐宰相也曰酋望曰正酋望曰員外酋望曰大將軍曰員外猶試官
也幕爽主兵琮爽主戶籍慈爽主禮罰爽主刑勸爽主官人厥爽主工館萬爽主財用引爽主
客禾爽主商賈皆清平官酋望大將軍兼之爽猶言省也督爽總三省也乞託主馬祿託主牛
巨託主倉廩亦清平官酋望大將軍兼之曰爽酋曰彌勒曰勒齊掌賦稅曰兵孺司掌機密大
府主將曰演習副曰演覽中府主將曰繕裔副曰繕覽下府主將曰澹酋副曰澹覽小府主將
曰幕撫副曰幕覽府有陀酋若管記有陀西若判官大抵如此凡調發下文書衆邑必占其期
百家有總佐一千家有治人官一萬家有都督一凡田五畝曰雙上官授田四十雙上戶三十
雙以是而差壯者皆爲戰卒有馬爲騎軍人歲給韋衫袴以邑落遠近分四軍以旗幟別四方
面一將統千人四軍置一將凡敵入境以所入面將禦之王親兵曰朱弩佉佉佉佉帶也擇

鄉兵爲四軍羅苴子戴朱髯整負犀革銅盾而跣走險如飛百人置羅苴子統一人望苴蠻者在蘭滄江西男女勇捷不鞍而騎善用矛劍短甲蔽胸腹髁整皆插貓牛尾馳突若神凡兵出以望苴子前驅以清平子弟爲羽儀王左右有羽儀長八人清平官見王不得佩劍唯羽儀長佩之爲親信有大曹長曹長有功補大軍將大軍將十二與清平官等列日議事王所出治軍壁稱節度次補清平官有內算官代王裁處外算官記王所處分以付六曹外則有六節度曰弄棟永昌銀生劍川柘東麗水有二都督會川通海有十賧夷語賧若州曰雲南賧白厓賧亦曰勃弄賧品濬賧遼川賧蒙舍賧大賧賧亦曰史賧苴咩賧亦曰陽賧蒙秦賧矣和賧趙川賧祁鮮山之西多瘴敵地平草冬不枯自曲靖州至滇池人水耕食蠶以柘蠶生閏二旬而蠶織錦繡精緻大和祁鮮而西人不蠶剖波羅樹實狀若絮紐縷而幅之覽賧并產鹽最鮮白惟王得食取足輒減甕昆明城諸井皆產鹽不征羣蠻食之永昌之西野桑生石上其材上屈兩向而下植取以爲弓不筋漆而利名曰瞑弓長川諸山往往有金或披沙得之麗水多金麩越賧之西多苻草產善馬世稱越賧駮始生若羔歲中紐莎縻之飲以米潚七年可御日馳數百里

王出建八旗紫若青白旂雉翼二有旄鉞紫纓之翠蓋王母曰信麼亦曰九麼妃曰進武信麼
出亦建八旗絳旂自曹長以降繫金佉苴尙絳紫有功加錦又有功加金波羅金波羅虎皮也
功小者衿背不袖次止於衿婦人不粉黛以蘇澤髮貴者綾錦裙襦上施錦一幅以兩股辮爲
髻髻耳綴珠貝瑟瑟虎魄女嫠婦與人亂不禁婚夕私相送已嫁有好者皆抵死俗以寅爲正
四時大抵與中國小差膾魚寸以胡瓜椒葑和之號鵝闕吹瓢笙笙四管酒至客前以笙推盞
勸酬以繒帛及貝市易貝者大若指十六枚爲一覓師行人齋糧斗五升以二千五百人爲一
營其法前傷者養治後傷者斬犁田以一牛三夫前挽中壓後驅然專於農無貴賤皆耕不絲
役人歲輸米二斗一藝者給田二收乃稅王蒙氏父子以名相屬自舍龙以來有譜次可考舍
龙生獨邏亦曰細奴邏高宗時遣使者入朝賜錦袍細奴邏生邏盛炎邏盛炎生炎閣 武
后 年南詔盛炎入朝 按唐書武后本紀不載 按南詔傳武后時盛炎身入朝妻方娠生
盛邏皮喜曰我又子雖死唐地足矣炎閣立死

元宗開元 年南詔皮邏閣授特進封臺登郡王 按唐書元宗本紀不載 按南詔傳炎閣

立死開元時弟盛邏皮立生皮邏閣授特進封臺登郡王炎閣未有子時以閣羅鳳爲嗣及生子還其宗而名承閣遂不改

開元 年賜皮邏閣名歸義以破洱蠻功冊爲雲南王 按唐書元宗本紀不載 按南詔傳

開元末皮邏閣逐河蠻取大和城又襲大磴城守之因城龍口夷語山坡陀爲和故謂大和以處閣羅鳳大子詔賜皮邏閣名歸義當是時五詔徵歸義獨強乃厚以利啖劍南節度使王昱求合六詔爲一制可歸義已并羣蠻遂破吐蕃寢驕入朝天子亦爲加禮又以破洱蠻功馳遣中人冊爲雲南王賜錦袍金鈿帶七事於是徙治大和城

天寶 載鳳迦異拜鴻臚卿 按唐書元宗本紀不載 按南詔傳天寶初遣閣羅鳳子鳳迦異入宿衛拜鴻臚卿恩賜良異

天寶七載閣羅鳳反攻張虔陀殺之 按唐書元宗本紀天寶八載特進何履光率十道兵以伐雲南九載雲南蠻陷雲南郡都督張虔陀死之 按南詔傳七載歸義死閣羅鳳立襲王

以其子鳳迦異爲陽瓜州刺史初安寧城有五鹽井人得煮鹽自給元宗詔特進何履光以兵

定南詔境取安寧城及并復立馬援銅柱乃還鮮于仲通領劍南節度使卞忿少方略故事南詔嘗與妻子謁都督過雲南太守張虔陀私之多所求丐閼羅鳳不應虔陀數詬斬之陰表其罪由是忿怨反發兵攻虔陀殺之取姚州及小夷州凡三十二

天寶八載鮮于仲通薄白崖城大敗引還按唐書元宗本紀天寶十載劍南節度使鮮于仲通及雲南蠻戰於西洱河大敗績大將王天運死之按南詔傳八載仲通自將出戎嵩州

分二道進次曲州靖州閼羅鳳遣使者謝罪願還所虜得自新且城姚州如不聽則歸命吐蕃恐雲南非唐有仲通怒囚使者進薄白崖城大敗引還閼羅鳳斂戰皆築京觀遂北臣吐蕃吐蕃以爲弟夷謂弟鍾故稱贊普鍾給金印號東帝揭碑國門明不得已而叛嘗曰我上世奉中國累封賞後嗣容歸之若唐使者至可指碑澡祓吾罪也會楊國忠以劍南節度當國乃調天下兵凡十萬使侍御史李宓討之輦餉者尙不在涉海而疫死相踵於道宓敗於大和城死者十八亦會安祿山反閼羅鳳因之取嵩州會同軍據清溪關以破越析梟於贈西而降尋傳驃諸國尋傳蠻者俗無絲繡跣履榛棘不苦也射豪猪生食其肉戰以竹籠頭如兜鍪其西有

裸蠻亦曰野蠻漫散山中無君長作檻會以屠男少女多無田農以木皮蔽形婦或十或五共養一男子廣德初鳳迦異築柘東城諸葛亮石刻故在文曰碑卽仆蠻爲漢奴夷畏誓常以石

撻

以上二事按本紀與南詔傳年數俱不相符並存以備參考

代宗大曆十四年異牟尋悉衆二十萬入寇發禁衛及幽州軍大敗其衆斬首六千級按唐書代宗本紀不載按南詔傳大曆十四年閣羅鳳以鳳迦異前死立其孫異牟尋以嗣異牟尋有智數善撫衆略知書母李獨錦蠻女也獨錦蠻亦烏蠻種在秦藏川南天寶中命其長爲歸州刺史世與南詔婚聘異牟尋立悉衆二十萬入寇與吐蕃并力一趨茂州踰文川擾灌口一趨扶文掠方維白壩一侵黎雅叩叩邾關令其下曰爲我取蜀爲東府工伎悉送邛笮城歲賦一縑於是進陷城衆人率走山德宗發禁衛及幽州軍以援京川與山南兵合大敗異牟尋衆斬首六千級禽生捕傷甚衆顛踣崖峭且十萬異牟尋懼更徙苴咩城築袤十五里吐蕃封爲日東王然吐蕃責賦重數悉奪其險立營候歲索兵助防異牟尋稍苦之

德宗貞元四年異牟尋謀內附按唐書德宗本紀不載按南詔傳故西瀘令鄕回者唐官

也往嵩州破爲所虜閣羅鳳重其惇儒號蠻利俾教子弟得筆撈故國中無不憚後以爲清平
官說異牟尋曰中國有禮義少求責非若吐蕃怵刻無極也今棄之復歸唐無遠戍勞利莫大
此異牟尋善之稍謀內附然未敢發亦會節度使韋臯撫諸蠻有威惠諸蠻頗得異牟尋語白
於臯時貞元四年也

貞元五年劍南西川節度使韋臯敗吐蕃於臺登北谷克嵩州 按唐書德宗本紀云云 按

韋臯傳貞元初代張延賞爲劍南西川節度使初雲南蠻羈附吐蕃其盜塞必以蠻爲鄉導臯
計得雲南則斬虜右支乃間使招徠之稍稍通西南夷明年蠻大首領苴那時以王爵讓其兄
子烏星始烏星幼那時攝領其部故請歸爵臯上言禮讓行於殊俗則怙戾者化願皆封以示
褒進詔可又明年雲南款邊求內屬約東蠻鬼主驃傍苴夢衝等絕吐蕃盟五年東蠻斷瀘水
橋攻吐蕃請臯濟師臯遣精卒二千與蠻共破吐蕃於臺登殺青海太酋乞臧遮遮臘城酋悉
多楊朱及論東柴等虜墜死崖谷不可計多獲牛馬鎧裝遮遮尙結贊之子虜貴將惇雄者也
旣敗酋長百餘行哭隨之惇將已亡則屯柵以次降定進檢校吏部尙書初東蠻地二千里勝

兵常數萬南倚閩羅鳳西結吐蕃狙勢強弱爲患臯能綏服之故戰有功詔以那時爲順政王夢衝懷化王驃傍和義王刻西林勿鄧等印以賜之而夢衝復與吐蕃盟臯遣別將蘇瞻召之詰其叛斬於琵琶川立次鬼主樣棄等蠻部震服乃建安夷軍於資州維制諸蠻城龍谿於西山保納降羌

貞元十年南詔蠻敗吐蕃於神川來獻捷

按唐書德宗本紀云云

按南詔傳臯臯遣諜者

遺書吐蕃疑之因責大臣子爲質吳牟尋愈怨後五年乃決策遣使者三人異道同趨成都遺臯臯書曰吳牟尋世爲唐臣曩緣張虔陀志在吞海中使者至不爲澄雪舉部惶窘得生異計鮮于仲通比年舉兵故自新無繇代祖棄背吐蕃欺孤背約神川都督論訥舌使浪人利羅式眩惑部姓發兵無時今十二年此一忍也天禍蕃廷降毀蕭牆太子弟兄流竄近臣橫汙皆尙結贊陰計以行屠害平日功臣無一二在訥舌等皆册封王小國奏請不令上達此二忍也又遣訥舌逼城於鄯噶邑不堪利羅式私取重賞部落皆驚此三忍也又利羅式罵使者曰滅子之將非我其誰子所當當爲我有此四忍也今吐蕃委利羅式甲士六十侍衛因知懷惡不謬

此一難忍也吐蕃陰毒野心輒懷搏噬有如媼生寶汗辱先人辜負部落此二難忍也往退渾王爲吐蕃所害孤遺受欺西山女王見奪其位拓拔首領並蒙誅刈僕固志忠身亦喪亡每慮一朝亦被此禍此三難忍也往朝廷降使詔撫情心無二詔函信節皆送蕃廷雖知中夏至仁業爲蕃臣吞聲無訴此四難忍也曾祖有寵先帝後嗣率蒙襲王人知禮樂本唐風化吐蕃詐給百情懷惡相戚異牟尋願竭誠日新歸款天子請加戍劍南西山涇原等州安西鎮守揚兵四臨委回鶻諸國所在侵掠使吐蕃勢分力散不能爲強此西南隅不煩天兵可以立功云且贈臯黃金丹砂臯護送使者京師使者奏異牟尋請歸天子爲唐藩輔獻金示順革丹赤心也德宗嘉之賜以詔書命臯遣譯往覘臯令其屬崔佐時至羊苴咩城時吐蕃使者多在陰戒佐時衣牂牁使者服以入佐時曰我乃唐使者安得從小夷服異牟尋夜迎之設位陳燎佐時卽宣天子意異牟尋內畏吐蕃顧左右失色流涕再拜受命使其子閣勸及清平官與佐時盟點蒼山載書四一藏神祠石室一沈西洱水一置祖廟一以進天子乃發兵攻吐蕃使者殺之刻金契以獻遣曹長段南羅趙迦寬隨佐時入朝初吐蕃與回鶻戰殺傷甚乃調南詔萬人異牟

尋欲襲吐蕃陽示寡弱以三千人行許之卽自將數萬踵後晝夜行大破吐蕃於神川遂斷鐵橋溺死以萬計俘其五王乃遣弟湊羅棟清平官尹仇寬等二十七人入獻地圖方物請復號南詔帝賜賚有加拜仇寬左散騎常侍封高溪郡王

貞元 年冊異牟尋爲南詔王 按唐書德宗本紀不載 按南詔傳十一年夏六月冊異牟

尋爲南詔王以祠部郎中袁滋持節領使成都少尹龐頤副之崔佐時爲判官俱文珍爲宣慰

使劉幽岩爲判官賜黃金印文曰貞元冊南詔印滋至大和城異牟尋遣兄蒙細羅勿等以良

馬六十迎之金鑲玉珂兵振鐸夾路陳異牟尋金甲蒙虎皮執雙鐸鞘執矛千人衛大象十二

引於前騎軍徒軍以次列諸旦授冊異牟尋率官屬北面立宣慰使東向冊使南向乃讀詔冊

相者引異牟尋去位跣授冊印稽首再拜又授賜服備物退曰開元天寶中曾祖及祖皆蒙冊

襲王自此五十年貞元皇帝洗痕錄功復賜爵命子子孫孫永爲唐臣因大會其下享使者出

銀平脫馬頭盤二謂滋曰此天寶時先君以鴻臚少卿宿衛皇帝所賜也有笛工歌女皆垂白

示滋曰此先君歸國時皇帝賜胡部龜茲音樂二列今喪亡略盡唯二人故在酒行異牟尋坐

奉觴滋前滋授觴曰南詔當深思祖考成業抱忠竭誠永爲西南藩屏使後嗣有以不絕也異
牟尋拜曰敢不承使者所命滋還復遣清平官尹輔曾等七人謝天子獻鐸鞘浪劍鬱刃生金
瑟瑟牛黃琥珀氎紡絲象犀越賧統倫馬鐸鞘者狀如殘刃有孔傍達出麗水飾以金所擊無
不洞夷人尤寶月以血祭之鬱刃鑄時以毒藥并冶取迎躍如星者凡十年乃成淬以馬血以
金犀飾鐸首傷人卽死浪人所鑄故亦名浪劍王所佩者傳七世矣異牟尋攻吐蕃復取昆明
城以食鹽池又破施蠻順蠻並虜其王置白崖城因定磨些蠻隸昆山西爨故地破茫蠻掠弄
棟蠻漢裳蠻以實雲南東北施蠻者在鐵橋西北居大施賧斂尋賧男子衣繒布女分髮直額
爲一髻垂後跳而衣皮順蠻本與施蠻雜居劍共諸川咩羅皮鐸羅望旣失邈川浪穹奪劍共
地由是徙鐵橋在劍賧西北四百里號劍羌磨蠻些蠻與施順二蠻皆烏蠻種居鐵橋大婆小
婆三探覽昆池等川土多牛羊俗不類澤男女衣皮俗好飲酒歌舞茫蠻本關南種茫其君號
也或呼茫詔永昌之南有茫天連茫吐薺大賧茫昌茫鮓茫施大抵皆其種樓居無城郭或漆
齒或金齒衣青布短袴露髻以繒布緣腰出其餘垂後爲飾婦人披五色婆羅龍象纁如牛養